



Ioachimus filius fuit illustrissimi principis Ernesti, atque Margarethæ ducissæ in Münsferberg Silesiorum. natus est anno Christi 1509, die 8 Augusti. Pater eius princeps optimus immatura morte obiit, atque ipse à matre prudentissima muliere puer adhuc pie educatus fuit. Cum autem nonum annum ageret, à matre & tutoribus Lypsiam missus, atque unà cum fratre Georgio præceptori M. Georgio Helt à Forcheim, uiro erudito, commendatus est. Is in primis curauit, ut hi principes in Historijs & Mathematicis disciplinis utcunq; instituerentur. rapiebatur etiam Ioachimus natura ad sacrum literarum lectionem, quæ adeò ipsum delectarunt, ut eas postmodum in frequenti usu habuerit. Id cum Adolphus cognatus eius, atque tum Episcopus Merseburgensis intellexisset, eum ad se uocauit, & in omnis generis uirtutibus instituit, ad annum Christi millesimum quingentesimum uicesimum sextum usque. Cum autem Ioachimus decimum octauum annum ageret, Georgius Saxonix dux eum in curiam recepit, atque per annos quatuor ut filium dilexit. uidebat enim mirabiles & heroicæ uirtutes in adolescente, cuius tutorem agebat, egregiè relucere. Postea anno millesimo quingentesimo tricesimo mater eius obiit. Itaque ad reipublicæ gubernationem accessit, atque cum fratribus Iohanne & Georgio summa concordia præfuit, ut hic sententiâ antiquorum: Fratrum quoque gratia rara: minimè locum habuerit.